

出使日記續刻

凡例

一前編以辛卯二月終卷。是編自辛卯三月朔起。至甲午五月止。併閏計之。得月四十。每卷四月。總凡十卷。一日記中文字。有已見庸盦文外編。海外文編者。十餘篇。茲不復錄。以免重複。間存咨文電報。與出使公牘。互見。庶當日辦事情形。可以參觀而得。

一公奉使以後。嘗輯續瀛環志略。徧譯西史。得數十冊。屬橐未竟。遽爾薨逝。論者惜之。是編於各國地志。採輯不少。雖不能如專書之詳細。而地球形勢。大致略備。

一滇緬分界事宜與英外部往復辨論管禿脣焦一年有餘始得就緒是編皆詳載之公之苦心任事於此可見

一滇緬界務之外如理論帕米爾坎巨提等部籌設南洋各島香港仰江領事以及爭論教案豁除海禁等事動關大局事雖或就或不就皆公精神所注多有已具奏疏公牘而備述於是編者讀者更可悉其委折則此書實與奏疏公牘相爲表裏

一歐洲立國以商爲本富國強兵實基於此是編歷論中國商務之不振而於海關貿易總冊每摘其大凡

各國財賦之出入開擷其總數意存法戒非特記數備考而已

一洋文地名人名多本還音絕無意義使館英法繙譯不止一人譯音往往歧出是編勢難改歸一律閱者當自得之

一陰晴風雨前編於中途舟行逐日記載是編歸程詳之猶前志也

一前刻文編諸書句皆有點惟日記無之是編附於文編點句之例以便省覽

一續刻凡例一仍前編茲謹另就管見所及略述一二

冀以表章先志幸大雅教正焉

出使日記續刻目錄

卷一

光緒十七年三月朔至六月三十日止

卷二

光緒十七年七月朔至十月二十九日止

卷三

光緒十七年十一月朔至十八年二月二十九日  
止

卷四

光緒十八年三月朔至六月三十日止

卷五

光緒十八年閏六月朔至九月二十九日止

卷六

光緒十八年十月朔至十九年正月二十九日止

卷七

光緒十九年二月朔至五月二十九日止

卷八

光緒十九年六月朔至九月二十九日止

卷九

光緒十九年十月朔至二十年正月二十九日止

卷十

光緒二十年二月朔至五月二十日止

先君子自同治四年遊曾文正公之幕始有日記  
嗣是以後未嘗閒也及奉使泰西凡遇交涉見聞  
諸事皆筆之於書並譯西國史志新報存其大略  
所記尤夥已刻六卷自庚寅正月迄辛卯二月皆  
先君子所手定辛卯三月至甲午五月日有纂  
錄閱時既久卷帙遂繁初擬東歸續刻不意甲午  
之夏使旋抵滬未及二旬卽以積勞得疾薨於出  
使行臺維時不孝瑩中迎侍左右奉喪而歸泣檢



遺棄痛不欲生。是年冬復丁繼母憂。旋又患病。經歲久置未刊。乃先取海外文編出使奏疏交姊婿蕭山陳君光淞。先君子門下士鄞張君美翊刻之。因日記皆係手彙。獨無副本。不敢輕付寫官。丙申秋疾既愈。乃躬自校錄。釐爲十卷。閱一年而工竣。於是出使日記始末完具。可備當世君子考覽。云瑩中泣念。先君子溺苦於學。雅好著書。自辦公外手一卷不釋。出使之時。不孝雖未隨侍以往。而平日趨庭應對。滌几捧硯之役。少習焉而心識之者。於是編如將見之。而今不可再也。因泣然流

涕而記之

光緒二十三年冬十月第三男瑩中謹識

出使日記續刻卷之一

無錫薛福成叔耘

光緒十七年辛卯三月乙丑朔記

法屬西貢暨南圻六省。其有華民五萬餘人。而柬埔寨一國有華民十六萬之多。華商貿易較西貢尤爲暢旺。日本報云。公爵三條實美爲日本元勳。薨後。日皇不惜帑金。賜以國葬禮。維新功臣之受此隆禮者。惟贈內大臣大久保利通。贈太政大臣巖倉具視。左府島津至本戶。與三條共四人而已。

初二日記

亞洲諸國。酷慕西法者。莫如日本。甚至改正朔。易服色。卽西人亦嫻笑之。然二十年來。於富強之道。竭力整頓。頗能大著成效。卽如商務一端。已遠勝於中國矣。大抵通商之要。不外四端。曰。培物產。工製作。精仿造。廣流通。四者旣備。乃可與各國爭衡。中國不知此理。一切聽其自然。絲茶兩宗。本恃爲出洋鉅款。今則日見其衰。售之西人。西人謂其貨愈劣。若有戒心。日本印度義大利法蘭西。乃起而攘其利。且自洋貨入中國。而華貨之銷於中國者。亦日見沮滯。近且停工不作。洋布盛則土布微矣。洋紗贏則土紗絀矣。細至洋針。洋綫。洋鈕。洋刀。無

不尙西人所製。邇復製造食物。仿織綢緞。精益求精。務奪我利。此中國未獲通商之益。反受通商之害也。日本則不然。國中土產培植壅護。灌溉翦裁。必求佳種。必令豐收。一切所出。今勝於昔。是物產培矣。銅器漆器。本屬擅長。近如魚鮓。鹿脯。紫苔。果實。無不愼加選擇。味美物良。況如紙料之佳。磁器之美。無不販致遠近。是製造工矣。仿造西貨。率多形似。如所製寒暑針。風雨表。鐘表。機括具備。價又極廉。西商射利者。轉販東洋之物。指爲西洋所造。是仿造精矣。日本地小物稀。曩時通商中土。其貨有限。今則製造日多。且精皮酒一項。西人亦喜日本。

所釀者自遠來沽是流通廣矣此四者振興商務之本也中國有一於是乎然則講求西法以奪西商之利者環顧亞洲舍日本其誰屬哉

初三日記

廣東沿海各礮臺皆係灰石築成恐難持久現擬改建鐵礮臺已有洋員偕同善後局員馳往海口履勘工程海河迴環線曲沙土停淤凡輪船入水一丈者兩年來已不能入口現擬裁灣取直以利通行天津道胡燏棻等已赴掛甲寺等處查看地段矣奉天釐捐爲抵補額餉收款大宗以商販外來糧石及本地產糧爲主

雜貨收捐不過得十之一二。自咸豐六年開辦起。歲收釐捐錢約在一百二三十萬千有奇。同治年間亦得百餘萬千。似俱指東錢而言。近年海禁大開。糧貨雲集。每年轉僅收錢七八十萬千。其故由奉天各河口自開辦河運以來。商民販糧。知城市設有釐捐。取巧繞避。陰赴沿河村鎮。與農民私相交兌。不惟漏釐。卽斗租河稅亦無從徵收。現據盛京戶部侍郎綿宜奏請在奉天牛莊之三岔河口設立補徵分卡。每糧一石補收東錢一百文。雜貨按糧一石之價亦補收東錢一百文。

初六日記

日本報云。朝鮮國民分爲六黨。隱然對峙於朝野間。互爭權勢。一曰王黨。二曰大院君黨。三曰王妃黨。四曰支那黨。五曰日本黨。六曰俄黨。惟王黨有忠君愛國之意。尤以妃黨爲擅作威福。自大院君勢弱。而閔妃之族遂得恣橫一時。支那黨則與商務委員袁世凱相聯絡。日本黨卽開化黨也。勢力頗強。與王黨堪伯仲。俄黨另有見解。時思歸俄保護。惟不敢顯受賣國之名耳。

初八日記

閏邸鈔正月二十五日

皇上御紫光閣。各國使臣巴蘭德。田貝。華爾身。大島圭。



介潘薩費果蓀署使臣吳禮巴關雷明林梓米師麗同  
於午刻

觀見因查此次領班者爲德使巴蘭德其餘則英俄法  
美日比荷日本義奧等國正署公使參贊繙譯等共三  
十二人

十一日記

鴉片煙之類有三一曰公班出明雅喇一曰孟皮出孟  
買一曰紅皮出曼達喇薩均由英屬印度製成爲土運  
入中國以每年十萬箱計算約合價銀六千萬兩而各  
省所產土藥大約九倍於入口之洋藥以減半之價值

山傳上言羅多 卷一  
計算共計銀二萬七千萬兩。

### 十二日記

亞細亞洲大江無論中國暹羅緬甸印度及俄屬之西伯利亞江源皆發自西藏之周圍高山其地勢較亞洲各處皆高嘗測量之比海面竟高至千丈藏地四周皆山其境最長之處約五千里寬處數百里至數千里不等地形長圓如雞卵其都會西人名之曰拉薩蓋卽布達拉城也。

### 十三日記

督辦雲南礦務唐炯奏稱滄海各埠股本難招而各廠

日有起色需用甚繁礦務公司稟請借發銀三十萬兩作爲辦銅底本分十年扣收以竟全功而維京運等因當公司開辦之初自未便以公帑輕擲嘗試又集股正形踴躍商力頗克自支更無庸公家接濟惟迄今將及三年費本七十餘萬幸各廠已有成效乃當喫緊之時商力已竭若不急爲接濟深虞半途而廢旣非體卹商情更恐貽誤京運權衡輕重已允所請借銀三十萬兩飭司自光緒十七年起十起第二批京銅起運以後按批扣收一萬兩公司自顧成本不能不竭力籌辦俾京運逐年加增自亦不待十年卽可扣收清楚

十六日記

電報云。德國前大將軍毛奇卒。二十年前德法交戰之時。謀略以畢士麻克爲最優。治兵以毛奇爲最練。二人分任將相。皆德之元勳也。金陵水師學堂之旁。增設一廠。以造魚雷。魚雷者。其形似魚頭。身尾各一丈有奇。以機關合而爲一。中實火藥。上有玻璃管。沈伏水底。遇鐵甲則管破而火發。其力之鉅。數倍水雷。且近來鐵甲前多用鐵網以蔽水雷。而魚雷則前有利刃兩柄。以破鐵網。其功用益宏矣。

十八日記

法議院議定加重西貢總督之權以專責成。法總統近給西貢總督諭旨云：一該督在法屬之印度中華爲法國代掌權柄之人，祇該督可行文政府、附藩部、尙書之信皮中，與各署通函。若法國駐劄極東方之各公使總領事、領事、副領事等，該督可徑行函達。所有交涉事宜，該督未奉政府允准，亦斷不宜辦。二印度中華地方各項事宜，由總督佈置派員辦理。一應文職亦歸該督遴委。惟提督頭等駐劄大臣稽查總辦二等駐劄大臣副駐劄官頭等管事官二等管事官臬司及大事總管，須總督保舉，請旨簡放。儻不稱職而又急無可待，該督可

撤其任。惟須立向藩部尙書申明其故。三該督可專條議定。獨任干係。授權於西貢提督及安南東京真臘之頭等駐劄大臣。遴委屬員。并假該提督等佈置事務之權。四該督所轄有提督頭等駐劄大臣統兵官水師統領及各局總管。該督可給提督及頭等駐劄大臣全權。或幾分之權。五印度中華之安內禦外。該督責無旁貸。是以屯戍之水陸諸兵歸其調度。除勢處危急擊退敵人外。所有兵事未經總督允准。不得擅動。但總督無統領兵士之權。兵士行動由武職大員辦理。申詳六該督。應設立練勇在印度中華之法屬地內。爲民保護巡緝。

其中各項職司亦由該督遴派。七所有駐兵地方由該管之駐劄大臣及武職大員申報後該督卽行指定其地。武職大員在該地兼辦駐劄大臣事宜。該地方等如以後不駐兵丁亦由總督定奪。八稽查總辦由總督派察銀錢事宜及收支人員并核算歸并各帳。至東京安南西貢真臘各項銀錢事宜亦可由總督派委攷覈。九西貢及保護地方之用款由總督按照現行律例每年列款請示政府。覈准後該督卽設法照辦。其有擬辦工程如各項興作各種寬典。如給地造火車道等各式合同溢過地方經費之外者該督應候政府批准而定。十一千八百

八十七年十月二十號上諭內一二三款及他款之相反此次上諭者概行廢撤十一首相兼兵部尙書商務製造藩部尙書外部尙書海部尙書承照辦理此次上諭喀爾拿押

十九日記

日本出產貿易始於孝謙天皇神護景雲二年初唐大曆三年賜錦帛於左右大臣使其易買新羅之物至仁明天皇嘉祥二年卽唐大中三年始有華船至筑前國迨醍醐天皇踐祚禁私買唐物遂絕邦交泊乎明治維新與各國立約海禁大開越四年卽同治十年遣全權



大臣從二位大藏卿子爵伊達宗城至天津與我全權  
大臣李傅相訂立修好條規十八則指定中國通商口  
岸與泰西諸國相同日本則以築池橫濱長崎神戶大  
坂箱館新潟夷港八口爲商埠中國駐日大臣則何如  
璋張斯桂副使黎庶昌徐承祖黎庶昌再任李經方先後持  
節而往其橫濱神戶長崎三理事由何星使派設箱館  
新潟夷港則徐星使始設理事然仍駐使署惟以時往  
巡日本派來公使則自伊達宗城後有副島種臣井上  
馨伊藤博文大戶璣榎本武揚大島圭介分設領事於  
各埠而以總領事駐上海其往來中國之輪船向祇尾

張丸橫濱丸東京丸薩摩丸四艘近又添西京丸神戶丸肥後丸爲七艘觀明治十九年海關冊中國出口運日本貨值銀七百十萬餘兩日本出口運中國貨僅值銀九萬五千餘兩迨至去年日本貨進中國口者增至七百三十八萬八千餘兩華貨運日本者祇四百八十三萬二千餘兩良由中國但聽商人之自爲而國家不爲經理日本農務商務則有農商務省以筦攝之保護之其署有官房有總務局有農務局有商務局有交務局有水產山林地質礦山專賣特許會計叢林製絲製綫諸局其官自大官以迄技手有條不紊秩然井然日

集善於營運之人。采其所長。去其所短。又仿造各種洋貨。精益求精。使外洋不能販貨而來。且更販仿造者出洋。充作洋貨。是以能擴充利益。商務日興。

### 二十日記

傳電之綫。以堅緻爲上。故能歷久不變。近聞法國改製鋼綫。經工藝師試驗。比舊製更爲靈捷。其法中用鋼綫。外包以銅。銅能運電。鋼性堅凝。以作電綫。尤爲合式。法國驛務署決計拆去舊用銅綫。改用鋼綫。

### 二十一日記

俄國創築西伯里亞鐵路。蓋有三意。一因中國與日本

皆有海口。可以互市通商。該國若不築路。使與海口相通。恐於商務大有滯礙。一因太平洋大水迢迢。必須築路而後。東西貨物。可以隨便來往。且可保護邊界。一見歐洲各國。皆以鐵路致富。強民皆稱便。故竭力仿效。不畏其難。共計長一千九百六十七英里。分爲三段。西至耳庫池。即西伯利亞省城濱臨白哈海。口在甘肅蘭州府正北。中至司顏屯。在中國北京正北。相距一千英里。東至琿春。約需英金一千八百餘萬鎊。

### 二十二日記

香港報云。俄國所屬西伯利亞之鐵路。自前年籌款興建工程。極形忙碌。從事其中者。有日不暇給之勢。近接

琿春等處遞來信息得悉此路已竣本年春間當可載客來往此路由西伯里亞接至歐洲將來由中國日本暨亞洲各國前往泰西較曩時倍形便捷俄人之爲此舉固屬不惜浩費尤爲殫竭精神其路程計長四千八百一十西里需費三千二百萬鎊途中隔越三大河僅由此建橋以渡則用款更鉅計自鳩工以來斬棘披荆鑿山通海不知幾煩擘畫所經之處不少菁華薈萃異日駕輕就熟則西伯里亞東方之金銀銅鐵等礦均易於開辦蓋前因開礦機器艱於載運故雖有美礦而未

暨乳蘇利轄內向多空曠之地。因與居民相去遙遠。寒煙蔓草。一片荒涼。幾爲人跡所不到。旣開此路。則轆轤銜接。不難煥然改觀。且該處水土極爲得宜。與法國佳山水之區無甚軒輊。十年以後。中日兩國之陸路商務。必盡爲俄人所奪。而俄屬琿春一帶。得此爲唇齒之依。必成重鎮。且扼其險要。進可以戰。退可以守。中俄儻有邊釁。俄人調兵運餉。呼應尤靈。不出兩旬。可將十萬援兵調赴中國邊界。由歐洲往中國。僅半閱月。卽可戾止。非若目前多費轉折也。

法國新報云俄廷於西伯里亞部鐵路一事定計從兩頭同時動工一在海參崴部及烏蘇里江之間約四百啟羅邁當一在歐洲境內約二百啟羅邁當至中間兩路接頭之處爲地甚長經費浩大或令俄商及他國商人承辦

### 二十四日記

泰晤士報錄仰江電云緬甸蠻暮幫辦大臣

英報稱雲官

南蠻暮往來通商之路頗不安靜有大幫華商行至英

屬之皮西渡

譯音

被華境略千人

譯音

攻劫華官照會蠻暮

英官請其保護已卽日撥兵前往

俄政府已與法商

議定貸國債銀六萬萬佛郎。係三釐行息。前所貸俄商款三萬五千萬羅布。係四釐半或五釐行息。

二十五日記

余與慶霽堂等至安佛里特舊院。訪法前王拿破侖第一陵寢。王以佳兵。當嘉慶二十年。爲歐洲諸大國所廢。始放於厄爾磯島。在地中海再流於聖海凌那島。在阿非利加西南大西洋道光元年王卒。年五十二。越二十年。國人奉柩以歸。以皇帝禮葬於此。四方官民來會者一千萬人。陵係北嚮。其基略低。須歷級而下。合五采石砌地。若輪圓徑約五丈。周圍鑿字。記王戰勝之國也。輪心置長方青金



巨石一高可尋丈縱二衡一上置紫肝石式同前惟鑿小其腰又其上卽紫肝石柳上侈下龕兩旁鑿大環四王卒時俄王以此石爲賻石工琢十二年乃就於其中納王棺焉柳下尙有巨石承之距地可三丈並不入土輪囷地外圍以遊廊白石柱十二枕南一室立王登極時石像生前所御冠劍銅鑪咸在廊之四壁鑿生平事蹟又設王臨陣手拏敵旂若干而北厯級而上籠銅爲門卽陵門也肖將軍二人守之兩旁累烏石爲牆光可以鑑傍門而上爲陵之上層飛金貼柱雲母嵌窗日光映射彪采煥發側室置王兄弟之曾爲義大利西班牙

王者石槨二具中爲大圈欄憑欄下視王之槨在焉。欄距五采輪圓地計八邁當其上屋頂覆作穹形飾以金頂。此陵內上下大較也。陵門外爲教堂二百六十年前法前王路易十四所造者。迨拿破侖王葬此乃合爲一。故將士多瘞其下。東西榮徧插將士所舉敵旂。有趙字赤幟未知所由來也。堂門之外爲大遊廊方廣百二十楹。北爲大門。門樓有王畫像與當時建功大將及路易十四像皆在焉。又一室以玻璃儲花草樹木欄干等物各少許。王流聖海凌那島園內物也。歷代兵器博物院在大遊廊之兩旁。養病兵院亦在大遊廊之旁。始有

千人近僅三百餘人。拿破侖朝之兵。尚有養至百餘人者。亦可見經理之善矣。

### 二十六日記

午初二刻。余率隨員學生等。由巴黎赴車棧。登火車。啟行。未初十三分。至阿民城。稍停。申初三十五分。至法國加利。一譯作喀雷。又作葛賴。海口登舟。又閱十分。開輪渡海峽。酉初十五分。至英國杜甫爾海口。一譯作都發。換坐輪車。又閱十分。開行。英國之車。向較法車飛行更速。追風逐電。無以過之。戊初三十五分。抵倫敦。采林克魯斯棧。換馬車。至使館。

二十七日記

英屬印度戶口現有二萬二千零四十九萬人較十年前約多二千二百萬。合印度附庸各土邦計之則共有二萬八千五百萬人。較十年前約多二千五百萬。此全印度戶口之數也。

二十八日記

本年法國稽查土著客籍人數巴黎一城有居人二百四十二萬二千九百六十九人較之一千八百八十六年多十六萬二千零二十四人。法國新簡之中國印度法人謂越南西貢等處曰中國印度總督拉南一譯作拉納桑爽定於西五月

三十一日由馬賽搭坐郵船赴任同行者爲提督來斯  
德候升副水師提督福祿諾即前在天  
津定約者

二十九日記

智利華十電報云亂黨所劫智利鐵艦一號昨被官軍  
水雷船轟擊沈沒死亡甚眾亂黨已與總統議和矣  
美國新簡駐華公使議紳布雷爾常在議院持禁止華  
人到美之論美政府已接中國照會不願接布君爲駐  
華公使行至舊金山外部電令速回華盛頓政府並無  
驚訝之意者蓋以中國如不願接他國派來使臣自有  
此權利也

四月甲午朔記

馬尼布一譯作抹尼剖又作滿尼坡爲印度土邦在印度之東北北

距阿珊東南距緬甸西距克差其十年前戶口有二十二萬一千餘有地七千英方里有兵七千賦稅所入約有印度銀五六萬羅比

初二日記

泰晤士報天津電云現欲將火車路推廣添辦三千噸鐵軌限百五十日交貨又百濟公司接到津信訂定鋪輪路倒泥川之車數輛俄屬琿春地方因無便當口岸停泊鐵甲兵艦及商輪各船無從運貨進口俄廷之

意欲封閉該口。作爲屯紮陸兵積儲軍糧之所。另擇新地在琿口之南。英里四十。買爾口名喊斯開的。作爲新開海口。以便大舟得以直達。惟此口水泓甚淺。口內泊船不甚方便。亦不能佳於琿春也。

### 初三日記

德國水軍計有大鐵艦十二。小鐵艦十五。大巡船八。小巡船十。尋常巡船四。礮船三。練船十。兵船九。其噸數共有十八萬九千七百九十六噸。汽機馬力共有十八萬八千三百九十匹。礮共有五百三十三尊。官與兵共有一萬七千八百六十員名。地球各國之電綫已有一

百六十八萬九百英里之長。可環地球赤道三十次而無不足。

初四日記

余前檄派直隸先用知府姚文棟乘遊歷印度之便。查看仰光商務。茲據稟稱印度各埠均有旅居華人爲數不少。而華人在仰光設立行棧。僅三四年。開埠最後且迭經兵燹。生理艱辛。非印度各埠可比。近來義舉善會次第舉行。宣講

聖諭。開設公塾。實他埠所未聞。又據稟稱印度一區。地當熱帶。物產之富。甲於五洲。埠之大者有三。在東曰甲



谷他

卽加爾各搭

在西曰孟買在南曰馬搭刺

卽麻特拉薩

皆瀕

海繁盛之區爲亞歐兩洲通商之樞紐孟買及馬搭刺駐有英國大員本兩大省會甲谷他乃孟加拉省之會城其大員駐此者有統轄全印度之權體制之尊擬於王者凡印度行銷四遠之貨俱從此三埠出口華人之商於印度者亦以此三埠爲多西洋人稱亞洲大埠以甲谷他爲第一而上海次之然孟買一埠亦足與甲谷他相埒查華商出洋開埠最早者惟甲谷他及孟買兩埠遠在新嘉坡開埠之先今新嘉坡設領事已逾十年而此兩埠尙未議及蓋因其地爲使節所未經故商情

無由上達耳。且印度北通西藏。東逼雲南。由甲谷他至西藏邊外之大吉嶺。火車一晝夜可達。由甲谷他至雲南邊外之新街。輪舟十餘日可達。昔年英人北取錫金。東滅緬甸。調兵調餉。均以甲谷他爲總匯。若於此埠設一領事。不但維持商務。亦可裨益邊防。查甲谷他西至孟買。輪船繞道甚迂。而陸路有火車可通。不過九百餘英里。甲谷他南至馬搭刺。火車略須繞道。而沿海有輪船可通。不過七十餘海里。苟使甲谷他有一領事駐紮。卽可以一埠遙控兩埠。不必再議添設以節糜費。

初五日記

姚文棟又稟請在仰光設立文報局一處。在八募設立分局一處。俾雲南與外洋往來文書得一捷徑。英國信船自大西洋入孟加拉海灣者。或從檳榔嶼經過。並無徑達仰光之綫路。查仰光華商閩幫最大。閩幫商家勝茂號最大。現舉其經手人監生林作秉經理文報事宜。凡遞文報由仰光西達英京。北通八募。輪舟火車俱有定程。不致遲亦不能速。惟野人山須候商隊帶過。頗費躊躇。然遇有緊要公文。亦可僱用獵夷專送。費亦甚輕獵夷之於野人。猶生番之於熟番也。計自英京至仰光。輪舟二十餘日。仰光至阿瓦。火車一晝夜。輪舟須行六七日。

因水淺之故。阿瓦至八募。輪舟五六日。八募至騰越。商隊行八日。如僱罷夷。不過兩晝夜。騰越至省城。雲南府共約二十八站。遞送文信。不過十晝夜。統計西洋達雲南。大約五十日左右。斷不出兩月也。惟傳電之法。須至新街閱看情形。後再定。現聞印督派員名華麗者。查看康東一帶之地。彼總先我一籌耳。

初六日記

近百年來西洋諸國。多得養民新法。其最盛者。美國產業於八十年之內。多至四十三倍。英國於八十五年之內。產業多至六倍。法國於六十年之內。產業多至三倍。

蓋美多曠土。皆係膏腴。可以開墾。故收效最速。英國得新式機器。製造各貨。並通商五大洲。故能坐致富強。美有七家。共得銀四百兆兩。英有五家。共得銀一百兆兩。德有二家。共得銀二千五百兆兩。法有一家。得銀一千兆兩。諸商之致此鉅富。實眾工人胼胝辛勤所致也。因此各工人設會。曰同心會。又曰同合會。計德美各有六十餘萬人。英有八十餘萬人。法國人數更多。動輒停工。實非與上爲難。不過求工資饒裕。且一日中限定作工四箇時辰。以資養息也。

### 初七日記

泰晤士報云泰西天文士測量地球距太陽之遠先後不同耶蘇未生前一百五十年協巴朝士謂地球距太陽英路五百九十萬里耶蘇降生後一千五百四十三年高巴拿士謂地球距太陽英路四百七十萬里一千六百二十八年基布拉謂地日相距英路一千三百五十萬里一千七百九十九年拉布釐士謂地距日英路九千二百八十萬里一千八百二十四年燕基釐謂地距日英路九千五百二十五萬里近日天文士均算得地距日英路九千二百八十九萬里前後各說不同如此可見測算之難

初八日記

去年英國查核阿爾蘭戶口計其男女四百六十五萬一千二百九十一人較之前屆稽查之時轉少四十九萬三千餘人

初九日記

護皖撫阿克達春片稱據統領威靖營記名提督李得勝稟稱該營駐紮亳州北關外距城三里餘有三皇廟同治初年爲博多勒噶台親王僧格林沁收儲軍火之處尙有炸礮火箭各件封存在內該營操防火藥亦存後樓光緒十六年八月十五日巳刻三皇廟後樓火藥

陡然轟炸。知州陳晉馳往救護。所有火藥及炸礮火箭等件。同時轟發。男婦老幼死者七十六名。草房瓦屋。轟燬者一百數十間。祠廟會館房屋。亦多轟震之處。查威靖營火藥存該樓。共計六百六十餘斤。派員經營。有勇丁看守。扃鎖慎固。惟樓北隔牆文昌殿。亦係樓屋三間。弁勇宿北樓下。此次火發之由。廟中曾作木工。木匠及勇丁均在文昌殿內煮飯。時天氣旱乾。亢燥已極。或因炊爨遺火所致。惟匠作弁勇俱已被火轟斃。無可究詰。該營槍礮軍械。向係另存他所。並無遺失。

初十日記



各新報錄日本東京來電。俄太子遊歷日本。將往東京。在阿租之皮佛湖上泛小舟。登岸行不數武。被下等巡捕以刀斫傷其首。創長三寸。尚不甚深。裏傷敷藥。卽乘火車往東京。或云該巡捕係瘋人。或謂係沙摹來教。向嫉洋人者也。太子略受微傷。刺客二次舉劍。被希臘太子用棍擊倒。日皇率其大僚立卽馳往問候。

### 十一日記

法國勒當報天津信云。李傅相擬在開平附近設立一廠。鑄造槍礮及鐵路等件。現正與克鹿卜商議合同。凡中國採購料件。准以若干歸克鹿卜獨自承辦。則現在

設廠之費克鹿卜願爲承認數年後仍以此廠交還中國其合同及詳細章程係德使巴蘭德在總理衙門商訂。泰晤士報初五日蕪湖鄉民滋鬧焚燒天主教堂。英領事署亦被燬領事逃避兵船中國二兵船由滬赴蕪彈壓。湖口縣城外武昌港梅家洲有兩處礮臺武昌港礮臺在石鍾山下地勢尙高梅家洲地勢稍低江湖漲時不免淹浸幸四圍礮隄堅固惟藥庫礮房須稍加黏補。

十二日記

客秋英國稽核南洋各島民數麻六甲八萬五千餘人。

檳榔嶼二十二萬八千五百餘人。白蠟十七萬五千人。惟內有五千人係在鄉間居住。新嘉坡十八萬四千五百餘人。追溯前十年。男婦僅有十三萬九千餘人。前二十年僅有九萬七千餘人。臺灣基隆金礦。每年出口過關之金。約值英金一萬五千三百三十餘鎊。英領事向巡撫言。出口漸多。應定收稅章程。前議洗金之人。不必納稅。上山開金之人。必須收稅。今思最好之法。莫若視出金多少。照數抽稅。並照洗金之人數而收之。

### 十三日記

泰晤士報錄仰光電述新報確信云。中國現擬與英國

商辦劃分中緬界限。中國擬自太平河起。流入厄勒瓦  
誦一譯作伊羅倭的江。離蠻幕北約十五英里。作爲兩國交界。  
若果以太平河爲分界。則附近該處之地。南北長約一  
百五十英里。寬二十五英里。現歸英國管轄者。勢將讓  
還中國矣。

#### 十四日記

徐筱雲少司農來信云。重慶通商之約。喫虧甚大。當時  
若聽其試行輪船。川江極險。勢難上駛。即使能行。後准  
其通商。而淺水輪船。裝貨無多。秋冬水落。船卽難行。彼  
亦不甚得利。無如川督力阻行輪。不得已准其用華式。

船隻通商彼可常年運貨自漢口至重慶數千里祇能征收正子兩稅沿途釐金所虧不少且洋商免釐華商征釐生意亦必爲其所佔官民兩受其損事旣至此亦無可如何矣

### 十五日記

許竹簣星使來書云德意志國輿地及列邦分合現今錢念劬與金楷理從事於此擬拓爲圖就各邦綴之以說略存其概而已代使之名法文之音曰沙涉大斐爾卽四等公使也近刻星輶指掌序例中言之以參贊署理公使者亦用此稱然各國皆派專使必其使臣有事

請假。乃用參贊署理中國使者兼攝數國往來駐紮。未嘗離任。安有另增一署理公使之理乎。此其沿用洋例舊稱。本屬不合。亟應釐而正之。此事使臣有應爲之權。不必請示總署。但咨請立案。或云令參贊某轉報而已。洋文照會詞內。從前或插入沙涉大斐爾字樣。沙涉者。譯言承當。大斐爾者。譯言公事。其義亦無他。其如爲相沿之牌子名色何。總在不用名色爲要。

### 十七日記

袁爽秋戶部來書云。香港設領事。此薊帥在粵所經營百方而不可得者。我公不動聲色。動刀甚微。謀然理解。

將來粵中交涉緝捕一切受益宏多無形之功勝於赫赫之功也喀什噶爾設英官既可牽制俄國不使獨擅商利又印度苟完隱然一敵國衛藏亦相庇而安俄英兩大莫敢先發新疆營繕其間反有磐石之勢且與英通商納稅則我之議改光緒七年新疆暫不納稅之條亦有辭此我之利非我之害無可疑也署中列憲有以喀城設領事須俟外部開談尊處勿先發端立論者乃邱憲持重過於矜慎之意相機裁決仍在台端持之耳

### 十八日記

西人近以最精回光鏡測知月中多山而南半尤多獨

月面幾盡山也。山形皆中窪若碗口。俱正圓。在月邊者。視之若擗圓。山之大者。內有小峰矗起。其狀酷肖地面。火山又窺月面。不見有雲。似已無氣。無氣則受日光處。其熱最猛。更甚於地面赤道之午正。而暗處必極冷。更甚於地面之二極。故月面各地。每半月酷暑。半月嚴寒。惟當光暗之界。疑有流水。其或一面受日。水蒸化汽。一面背日。汽凝爲水。因各得氣之平。固未可知。惟自地推月徑一杪之圓面。約方三里。故今之遠鏡雖精。尙未能證其有人與否。因未能察及房屋田畝也。至月面雖無氣。然未必全月面如此。故亦可生人物。或在背地之一



面也

十九日記

蟹之佳品產江浙間者凡數種曰湖蟹出於太湖殼軟而色黃至冬益美爲最上品曰紫鬚蟹出於吳江體巨而肥有一枚重二斤者曰尉遲蟹出於崑山之尉洲曰潭塘蟹出於常熟之潭塘殼軟而爪拳俗呼爲金爪今人所謂蟹爪菊蟹爪水仙者殆指此也曰玉埼蟹出於無錫之玉埼鄉大抵皆以近太湖而佳他若江蟹黃蟹之類味少減矣至若外洋之蟹瑯春有蟹一種其巨異常其殼有闊至五六尺者居民鬻其肉而售於市以其

殼建作門坊。小者用覆醬瓿。或作雨傘。惟質粗味劣耳。西印度之巴苗地方。有蟹殼巨且重。殼端尖起如峰。雖負此重殼。多力異常。每日由海渚登山覓食。橫行郭索。其捷如飛。西人以其多力。無異於帶甲之兵。因名之曰兵蟹。新金山之急屈埃蘭島。有蟹陸居。並不在水之涯。其色白。其身扁。有如紙狀。行則跳躍。傾欹反側。望之如風之吹紙。美國之亞仙申島。中有蟹。半水半陸而居。善於緣木。每日登樹杪啖蔬果。雖參天直木。上下如飛。趨捷如猿。不易捕之。其地又有蟹一種。體略巨而嗜食兔肉。每登山搜得兔窟。卽入穴攫兔。以果腹。兔無得免者。

夫以介族而食毛族可見造物制剋之妙無奇不有

## 二十日記

歐洲學堂之教士及國家之行政以地理爲始基以商務爲歸宿故其風氣皆善尋荒地而墾闢之南北美洲皆英吉利西班牙葡萄牙人所闢也今美國人固皆英人之種其餘各國人亦歐人種也其土番則日漸微滅間有與歐人聯爲婚姻者浸化爲歐人種矣至於澳大利亞一洲則全屬於英阿非利加一洲則英人法人德人比人分往占踞經營墾闢漸有成效數百年後必多富庶之區是歐洲而外凡美洲阿洲澳洲皆歐人地也

亞細亞一洲地最大。自土耳其原有之中東兩土外。今五印度則屬於英矣。中亞細亞遊牧城郭諸國。則十之八九屬於俄矣。亞洲極北之境。西伯利亞以東。南瀕黑龍江。東傳於海。則盡屬於俄矣。南洋諸大島。則分屬於英。於荷蘭於西班牙矣。卽緬甸越南柬埔寨。六分屬於英法矣。是亞洲全境。入於歐人者。殆已逾十之七。惟中國日本暹羅波斯阿喇伯四五國。尙稱自主。而阿喇伯前曾服屬於土耳其。勢亦甚微。中國地廣民眾。其可以自強之勢。庸詎不如英俄。或且能駕而上之。況以區區之日本。尙知力圖振興。豈中國反不如日本乎。然中國

宜爲自強之謀迫矣急矣不自強則僂焉不可終日矣而今之執政者若不甚措意焉何也蓋狃於承平時舊習之過也

### 二十一日記

叻報云防海之法宜築礮臺於平地礮在地面之界綫下與水面之界綫平就地挖坑使礮彈由坑內衝出直擊敵船礮上用太平蓋以避田雞彈其蓋與地面平礮後與牆相距數尺以通風氣取其易散火藥之煙雖今船內康邦機器均在水綫之下平擊不能壞其機器然船可毀壞人必痍傷敵如擊我高則彈子飛空低則入

地我擊敵。遙則仰礮。近則平礮。凡從高擊低。難以命中。從下擊上。易得破綫。平原曠野。宜用克魯伯八生後膛。及五管哈乞開司車輪礮。大毛瑟槍。可以擊遠。若山路崎嶇。宜用火箭及呿啫士打快槍。單管哈乞開司礮。改用單輪以行山徑。僅守營壘隘口。宜用魚雷及四管拿勝飛礮。

二十二日記

駐法參贊慶常來函云。修約一事。法約有十年之期。而無半載之限。雖已逾期五月之久。如彼此願修。仍可聲明。法議院會議稅務。有請仍舊者。有請加重者。尙無定

論據外部總辦葛拉物里云舊章行之已久商務亦好似可無須修改如彼此有小不便處不妨聲明量爲變通現未查出不便之處等語蓋彼所得利益無以復加所以願仍舊貫也呂宋地方日本已設領事而我獨無況日都倭無使館以駐法公使兼之用力少而成功多令人可愧駐華俄使葛希尼赴京任事兼修約章昨過巴黎晤談甚久西貢設領事減身稅皆有可圖之機義國拿波里中西書院既經教會學部商定由書院賠給一萬二千佛郎并傢具等物似可就此收場矣

二十四日記

是日爲西五月三十日。赴君主壽讌。蓋後誕期六日開筵也。

二十五日記

徐彼雲少司農來書云。香港設領事。往年未經辦到。去歲華爾身來署。述其外部之意。欲在喀城設官。本署未經允許。並告以卽如香港。中國欲設領事。英國何以不允。此原是抵制之辭。華使當時卽云。如中國許其在喀設官。則香港領事亦可相商。本署恐其遂欲兩相抵換。又復用言支宕。遂作罷論。想華使必將問答之語。達知本國。故於閣下請設香港領事。卽行允諾。以示先施。冀



可遂其所請。現在此事勢難再拒。且藉以牽制西鄰。使之有所顧忌。未始無益。若能如來示所云。稍索利益。則更善矣。領事給發准照一節。爲西國通例。索之不爲無辭。度彼必云。俄領事如給准照。彼亦可以照辦。此事能否辦到。恐無把握。至其願照稅則納稅。則前數年署使歐格訥早經言之。蓋其注意新疆久矣。刻下華使尙未提及。擬俟其開談。再行函致尊處。與之商議。較之在此商辦。自更得手。閣下力任其難。曷勝欽佩。此事或須先行奏明。請

旨辦理。尙須與諸公商酌也。

出使日記續刻

卷一

天傳經樓校本

二十六日記

巴黎覃排報云去冬馬尼布酋爲其兩弟所廢逃至嘎爾格達其弟一攝國政尊稱曰序白拉將待印度總督之核准一掌兵權名扇那蒲低序白拉爲人懦弱而扇那蒲低則精明強幹甚得民心印督將以廢兄之罪歸之扇酋仍聽序白拉久於其位派駐紮阿桑大臣

印度東北

之省居民四百九十萬

經同前赴馬尼布欲擒扇酋僅帶四百人

以往而馬尼布有強兵六千駐馬尼布之英員格林胡特密告經同云扇酋非低首就擒之人經同不聽遂欲誘擒扇酋屆期扇酋稱病不到經同登門搜捉格關不

勝與其隨帶員弁皆被擒見殺格林胡特亦被殺英駐  
緬甸大員調兵進發馬尼布人三萬開仗而敗英國分  
屯葛依瑪街薩八募之兵剋期會集於馬尼布印度前  
月電信云大兵已抵馬尼布該邦宮殿空無一人邦主  
兄弟及統兵之將皆已逃遁英官被殺者之尸尙存邦  
主潛入山內英兵跟追獲之以歸

### 二十七日記

於地面仰測諸曜見其時時行動異於恆星者不獨日  
月也又有諸星其近且大者曰水金火木土五緯也其  
遠而難見非遠鏡不能察者曰天王曰海王其微而難

見者亦必窺以遠鏡。近時所已測見者約有百十餘星。恐未測見者尙多。與小恆星難別也。諸行星之道亦自西而東。除穀女武女天后諸小星外。其道俱近黃道。凡行星皆小於日。然有大如地及大於地者。諸行星上設有動植諸物。其性質必較地面諸物不同。蓋諸行星異於地球者三。受日之光熱多少不同。攝力大小不同。體質疎密不同也。土星實徑約二十二萬五千里。體積大於地球約一千倍。

二十八日記

安徽攔江磯地方形勢扼要。沈仲復中丞奏請建造礮

臺刻下工程告竣中丞馳往驗收

印度報云西歷一

千八百八十八年印度茶錫蘭茶運進英國口岸者重英權一百十三兆磅八十九年進口者一百二十七兆磅九十年一百四十六兆磅而中國茶進英口者一千八百八十八年一百五兆磅八十九年八十八兆磅九十年七十四兆磅恐將年少一年矣

### 二十九日記

法屬越南之南圻度支歲入淨銀七百五十萬員而地方公雜派不與焉歲出不及七百萬員而地方公費不與焉計入浮於出者七八十萬員歲入以出入貨

稅爲大宗。約得四百萬員。次地丁兩稅。約一百二三十萬員。次工商之稅。約七八十萬員。次雜稅。如洋藥材木之屬。約五六十萬員。次華民身稅。約三十五六萬員。又華民進出口及寄居執照稅。約六七萬員。又華民於常例之外。另交身稅照稅等項。歲約四十萬員。有奇。度支出款。以俸餉爲大宗。工程之費次之。

三十日記

開圻賦稅之制。十有六種。現開稻田約九十萬頃。每法地一與計中國方歲開新田。以萬頃計。歲產米九百五十萬石。至一千萬石不等。除供民食外。出口之米。歲約八百

六七十萬石。其得米價約一千二百五六十萬員。運往中國者十之六七。往南洋者十之三四。售米經華商手者十之八九。經西商手者十之一二。故南圻米市之利。華商獨擅之。粟米之外。產皮革材木魚鹽木棉骨角毛羽漆絲。酸椒燕窩魚翅之類。除本地需用外。每歲出口值價四百萬員左右。進口貨以洋布魚網爲大宗。歲價約五百萬員。次五金之屬。值二百萬員。次煤。次雜貨。每歲進口價值七八百萬員。凡南圻商務之利。華商得十之七。西商得十之三。

五月甲子朔記

石蘭莪亦曰吉隆。去年核計民數。西人巫來由人華人  
印度人雜種人共男女八萬一千四百有奇。內華人五  
萬一千一百名。白蠟民數二十一萬四千七百有奇。內  
華人九萬四千四百有奇。又統新嘉坡檳榔嶼麻六甲  
三府民數男女共五十萬二千有奇。中俄商務以茶  
爲大宗。近日華茶之在俄銷流者較昔爲盛。蓋華茶雖  
減銷於英屬。仍倍售於俄邦。然繫長補短。有絀無盈。

初二日記

姚文棟稟稱緬甸海口之埠凡三處。而仰光扼其要。沿  
江之埠二十二處。小者二十九處。而阿瓦與新街扼其



要海口商務。閩商主之。沿江商務。滇商主之。粵商生意之大。不如閩人數之多。不如滇等諸自創以下而已。天津林西鐵路業已竣工。鐵路公司接築鐵路。擬由開平古冶林西而至山海關。經濟瀋陽以達吉林。已派員在唐山一帶履勘插標。附近澳門有青洲海島。係香山縣屬地。周迴二里許。矗立海中。在澳門租界之東。葡人踞而有之。英人於島中建築樓臺。爲避暑之地。現聞英葡議填塞海面。正對澳門蓮峰廟築馬路以達彼岸。

初四日記

姚文棟函稱雲南邊外有孟拱。孟養木邦蠻蕃諸土司。

出使日記續刻

卷一

三

傳經樓校本

向屬中國其地爲玉石百寶精華所萃內有紅寶石礦藍寶石礦翡翠礦琥珀礦種種不可勝計英人占其地爲己有恐中國索之是以願將揮人各地讓歸中國編屬揮人相傳有九十九土司華人經商於其地甚眾民情頗向中國山中物產亦夥有乾隆年間所遺界碑及糧臺遺蹟數處騰越人毛英德捐分部員外郎言之甚詳彼有分號兩處在揮人境也又商人許姓言去年外部接中國星使照會後知勘界在卽印度總督派員分道查界一查北路野人山一帶一查東路揮人一帶此員名方華麗兩路員弁首塗時有騰越舉人張成濂遣人潛尾其後

伺察彼之所爲以緬文詳記之北路查勘四閱月已蕨事而歸東路去已六月尙未回張成濂生長緬地熟悉緬文留心邊事與毛英德同爲有用之才

### 初六日記

諸行星除水金火及諸小星外皆有月少者一多者至六七月之繞行星猶行星之繞日也木星有四月土星有八月天王已測得四月或云六月海王已測得二月木星經歷代細測其四月甚明了繞行木星亦自西而東天王四月之繞本星則自東而西至彗星借日光而明無可疑者蓋彗乃薄氣積成能透日光故內外通明

也。蓋彗體甚小而包體之氣甚大。體與氣俱受日光而明焉。

### 初七日記

海參崴電信云。西伯里亞第一段烏蘇里鐵路已成。四月二十五日。俄太子首先開車。眾人稱賀。極其熱鬧。太子在車站立一銀牌。以示不忘之意。此已成之路。不過二俄里半云。古巴初設領事時。中日所訂之約。凡日國准他國設領事之處。均准中國設立。況日本在小呂宋已設領事。日本在西班牙並無使館。祇以駐法公使兼之。而中國在日都早有使館。然則小呂宋設領事一

事但能認真爭論未必無把握也。許竹簣星使現卽赴荷欲議噶羅巴設領事事又恐難允尙在躊躇又接西班牙參贊函小呂宋設領事一層復經外部駁卻勢難再議。

### 初八日記

李伯行星使奏稱中國與日本通商口岸橫濱神戶長崎設正理事官外嗣因箱館新瀉夷港商務漸興添設副理事官一員此外築地一處歸橫濱理事兼轄大坂一處歸神戶理事兼轄近年大坂商務日盛交涉漸多而築地坐落東京華民寄寓益眾現擬請築地大坂二

處仍歸橫濱神戶理事官兼轄。惟再設副領事各一員。於隨員中擇其廉幹有爲者。分別派充以資助理。二月十三日奉

硃批著照所請該衙門知道欽此。

初九日記

俄造西伯里亞鐵路。三年前已有人建議。自叻母斯克

至歐庫資克。

一譯作耳庫池

有一千五百六十七俄里。卽一千

零三十四英里。爲第一段。越拜開湖。自拜開湖之東岸。

沿西倫格江。烏大江。希爾楷江。過大金山而至司屈來

真司克。

一譯作司顏屯

有一千俄里。卽六百六十英里。爲第二

段再由黑龍江順流而下至烏蘇里復由彼處造至琿春有三百八十三俄里卽二百五十三英里爲第三段加以枝路三十一俄里卽二十里半英里其路共長二千九百八十一俄里卽一千九百六十七里半英里其造費與備火車約需俄銀一萬萬二千二百萬盧布卽英銀一千八百三十萬鎊 俄廷會議西伯里亞太平鐵路事宜限定六年竣工

初十日記

中國所設電綫幾徧二十一行省海軍衙門王大臣又以鐵路當與電綫相輔而行奏明由林西接至山海關

俟此路告成後每年由戶部撥銀二百萬兩以作經費  
再由山海關經東三省而達琿春蘆漢鐵路暫議罷築

### 十一日記

俄國之教門最雜計從希臘教者八十兆從天主教者  
八兆從耶穌教猶太教者各三兆從回回教者兩兆六  
十二萬余前檄派姚文棟查看印度緬甸商務其所  
經歷之各埠曰印度曰麻打拉薩曰加刺吉打曰達芝  
零曰孟買曰緬甸曰仰光曰峇刺波利曰萬底除仰光  
一埠外皆張蔭帥前遣王余兩委員所未到者華人在  
加刺吉打通商已一百五十餘年開埠最早生意極大



爲亞歐兩洲貿易之樞紐。上年駐藏升大臣勘界到此。眾商求派領事。允爲設法。

### 十二日記

美國朝廷初擬由舊金山設立海底電綫。通至日本。派水師副提督卑路勒前往查勘。勘至一處。將鉛放下。探其深淺。至四千六百四十三尋。尙未到底。現已停止興工。近來俄境分十一部。每部有大臣統轄。此外軍機處爲朝廷辦事之所。統理事權者係俄皇季父。教會之事。別有教部掌之。國中省會分六十三處。外又有十四路。每省有巡撫統轄。

十三日記

天空除日行星彗月之外尚有無數光體大小明暗不等而相與成方位永不變亂故名之曰恆星天文家測恆星之明暗自一等至七等光漸微自八等至十六等非遠鏡不能見矣恐十六等以下尚有無數星今未能見也前人所測定之等不盡同大約一等星二十三或二十四二等約五六十三等約二百總計一等至七等見於各家表者自一萬二千至一萬五千未定天河爲無數小星之光所積而成更不可數計蓋行星俱受日光恆星不藉日而自發光或者各自爲日而別有諸行

星繞之固未可知。但遠不能測。亦未敢懸斷耳。

### 十四日記

天主教入中國以來。教士被殺者前後已有九十人。此次蕪湖之變。幸未傷一人。查天主教在華。教會有二十五處。以大教士二十九人分治之。傳教者計有法人七百五十一名。華人四百二十一名。佐之以教授一千八百五十八名。尼姑三千名。在三十一經院。專教教門書籍以便學成教士一千零八十一。學塾中爲生聚陶淑之計。中國

現有電綫長二萬六千五百三十啟羅邁當。今又在甘肅之西設立一綫。接至俄西北邊界。中俄新立合同載

明華綫俄綫接頭處在黑龍江境內之山谷中

十五日記

越南之北圻以甯平清華兩省爲中圻之分畫截長補短東西廣九百里南北長八百里河內乃安南歷代舊都城名昇隆越人謂之東京其近海之河內等八省江河縈繞謂之江套江套諸水多發源中國最著者四一曰富良江又名紅江因江水逐紅沙以行水爲之赤故名發源衛藏由保勝入北圻歷興化山西南會沱江北會洮江貫注河內至南定甯平入海二曰太平江發源滇粵羣山之間歷太原北甯海陽廣安以入海海防一埠卽太平江入海

之咽喉也。富良太平二江之間有運河三道。水深六七尺。爲貫通二江之渠。曰灘河。在河內之北。曰渡河。在海陽之南。曰竹河。在興安之南。二江支流環繞四通八達。三曰洮江。又名清河。發源雲南。由開化之蓮花灘入北圻。歷興化之北。東會龍江。經宣光而南。入富良江。其匯流處卽越德關也。在山西興化之間四曰沱江。又名黑河。發源雲南。由土司地入北圻。歷興化南境。東流至石埔。開轉流而北。入富良江。凡諸水上游爲山林礦廠之境。下游爲水澤稻田之鄉。下游多良田沃野。財賦食貨之所自出也。

十六日記

華民在諒山高平者由廣西陸路而來娶越婦長子孫視爲熟路故二省民數華民居三之二越民不及三之一其在各口者則來自閩廣瓊州而粵人最衆大抵海道來者爲通商陸路來者爲開礦從前華民在諒山廣安高平太原北甯諸礦者十餘萬而在河內北甯海陽南定各口貿易者三四萬開釐以後礦廠大半停工商務爲之阻滯日前各口華民二萬有奇以海防爲總匯各礦廠及邊界華民約五六萬而傭工無幾蓋北圻生齒極繁已有人滿之患凡力役之事越之男女皆優爲

之工價廉於華人也。至黃黑旂之餘黨，法人目爲華寇者，亦有數千。而越民之不服法者，亦附焉。

### 十七日記

向來英館每隔一二年，或四三年，必請茶會一次。自丁亥年劉前大臣任內，曾有茶會。至今已越四年矣。余到此一年有半，酬應主客官紳，赴招茶會，已不下數十次。自不能不答厚誼，而聯眾歡。先期一兩月，卽分帖延訂。是晚十點鐘至一點鐘，各國公使參贊隨員及倫敦著名官紳會者五六百人。此事由馬清臣悉心經營，陳設華煥，花草鮮美，肴果豐潔。僉謂此等排場，爲各使館所

僅見云

十八日記

覃排報云馬尼布叛酋擒獲後英官連日審訊以該酋  
扇那蒲低與英君主大兵抵敵且殺害英國武員厥罪  
難辭遂判以纓首之刑 巴黎報云駐華各使干請中  
國政府之事已有效驗中國

大皇帝明降諭旨申明保護西人及教士等一切章程  
揚子江鬧事各犯卽按律懲辦懸擱事宜亦將速結聞  
此道

諭旨并頒刊印張掛



二十日記

姚文棟密函稱滇兵有兩營度野人山至蠻弄迎候英兵欲送至野人山半路之紅蚌河交卸以爲彼界在此已力辭之并招華兵四人至新街迎接又函屬大營移至蠻弄駐紮四日而後啟行以微露中國之意須以新街爲界而蠻弄爲吾內地也緬甸地廣人稀洋兵勢弱故汲汲趕造鐵路不日可由格薩通至嘎爾格達以便運兵往來同舟有鐵路工師一人卽係經理格薩鐵路者此路由格薩通至孟拱由孟拱通至阿桑阿桑本有鐵路接至嘎爾格達又有兵房工師一人係至新街營

築兵房。聞爲剿撫野人山之計。英兵駐新街者。英人二百名。印度人八百名。皆係新調到者。滇邊恐不免多事矣。英派查探北路之員。覓得一間道。可通騰越之古永。練又覓得一間道。可由昔董通至蓋西。皆中國土司或其意欲爲後來潛師入滇之地。出於滇人所不防邪。

二十二日記

通商以來。論者慮銀錢流出外洋固矣。然外洋之耗中國。乃黃金。非白銀也。西洋制幣。皆以金錢計數。零星交易。始用銀錢。英美諸國皆然。法國銀幣較重。仍不敵金。德國二十年前。尙重銀幣。近始改鑄金幣。美國近來金

礦漸虛。銀礦尙盛。聞昔內地金僅銀數兩。二十年尙在十兩內外。今至二十兩以外。與西國金價相若。非西人運往而何往哉。曩者雲南出金。經兵亂而止。吉林出金。驅逐金匪而亦止。今惟恰克圖邊外。俄人所採金砂。經華人竊購流入中國。轉藉鄰邦漏出之銀。以供挹注。設彼禁絕私銷內地。金源將竭。經營北邊金礦。似爲時務所宜。據俄礦師云。自恰克圖至庫倫。中途烏羅河烏峒山一帶。皆有金苗。金砂。至於唐努山北。葉尼賽河上游之水。富有金砂。俄人越界淘金。前年驅逐有案。

二十三日記

英屬阿洲之急打羽因地方稽核戶口西人之居是地者共三十七萬七千名土人一百十四萬七千名合計一百五十二萬四千人開平煤礦歷年共費銀二百三十萬近來生理甚旺所出之煤不敷銷售近又在林西另開一煤礦祇費工本銀三十萬兩煤質甚佳其苗較旺

### 二十四日記

從前水師制勝端推水雷西語名曰託皮憐現在新製雷船如魚游泳能於水底駛行各國式樣不一惟法國價廉且堅利無前其式如魚長一丈八尺寬五尺身圓

而短全以純銅製成。中坐兩人。旋以螺絲水不得入。進退上落。不用柁。而用輪。不用火。而用電。比及敵船。卽解本船兩旁所繫之託皮。倚潛置敵船之下。引以銅絲。而撥本船至極遠之區。僅將銅絲捻合。當卽過電。而託皮倚聲響如雷。敵船立成齋粉。並有鐵練兩端。繫以浮樁。置於敵船之下。瞬卽上浮。纏繞重輪。船難行動。此船每點鐘能行二十里。入水可深至三十丈。又有收取空氣之區。每兩點鐘能換養氣。人坐其中。至八點鐘無妨。每船費銀不過八千兩。約有十艘。便足防護海口。西班牙已仿造矣。

二十六日記

葡萄牙幅員三萬四千六百方里。比西班牙地得六分之一。舊分十七省。現分境內爲六省。從前兼轄巴西地。大於葡萄牙數十倍。道光四年。巴西始改爲自主。葡萄牙講求航海之學。始於宋末元初。迨明洪武年間。國王約翰勵精圖治。勤於探地行海經商之要務。遂以航海稱歐洲之冠。明世所稱大西洋者也。宏治年間。先至好望角。遂由好望角而至印度。是爲歐洲通印度之始。又與日本立通商之約。嘉靖以後。國勢寢弱。至今商務亦大遜於前。蓋爲英人所奪云。

二十七日記

近核東西洋各國在中國通商者統共八千一百七人。洋行五百二十二家。內英國三千三百十七人。洋行三百七家。美國一千一百五十三人。洋行三十二家。日本八百八十三人。洋行二十九家。德國六百四十八人。洋行八十家。葡萄牙六百十人。洋行五家。法國五百八十九人。洋行十九家。西班牙三百四人。俄一百三十一人。瑞典一百五十五人。其餘各國皆不過數十人而已。

二十八日記

俄西伯利亞鐵路自烏拉嶺南專利阿排起穿西伯利

而抵海參崴長七千四百啟羅邁當工部估本四百八十兆盧布期以三十二年竣工俄提督項曩谷夫估本三百兆盧布期以四年竣工其經費則擬借國債於巴黎今日自歐運華之貨如煤麪糖等及種種出產製造各物每年約值三百五十兆方俄路若成冀分其一半生意又有運往日本之貨且茶葉自華運歐亦可攬載從此由倫敦至海參崴祇須早路十七日再由海參崴至上海海程三日耳

### 二十九日記

昨准總理衙門密電云月來教案疊出蕪湖丹陽武穴



無錫金匱陽湖江陰凡七處武穴斃教士一人洋關扞  
手一人皆英籍餘皆法教堂焚燬情形不一至謠詠所  
由因蕪湖教堂華妊醫爲街上幼孩治病孩父執送以  
爲迷拐蕪令留押一宿教士往索卽釋匪眾遂譁竟將  
教堂焚燬上下游各案因之紛起當拏蕪案首要正法  
傳首兩名餘罪十名武穴獲十數名訊實兩名擬抵償  
外丹陽獲九名無錫獲六名尙無確供本處申明條約  
保護奏請

諭旨明發以期彼此相安業經咨會在案現英法德三  
使屢次同來爭論尙以我辦理未速爲詞告以匪犯四

散各督撫已派兵兜拏購綫訪緝辦理毫不鬆勁。蘇令  
撤任五縣摘頂地方官應得處分亦並不姑寬。但拏犯  
須嚴密抵罪須確實。地方官辦理如何亦須全案奏結  
方能定奪。斷斷不能以憤詞急索。以上各節望詳告外  
部免爲一面之辭所搖。致傷睦誼。並轉電竹使照辦。均  
電覆。余接此電除轉電俄館外。又函屬慶參贊告法外  
部。余自赴英外部面見克蕾告之。克蕾以筆一一記之。  
且云此事除失物賠償外。竊望中國辦理嚴速。以懲匪  
黨庶可日久相安。

六月癸巳朔記

總理衙門三月二十九日吉字七號函開昨接夔石制軍序初中丞咨稱據騰越鎮總兵張松林等電稟正月間傳聞有野人殺斃英人之事當卽飭人密查旋探稟洋人因不時失馬帶同野子勒令清查自帶帳棚宿野寨外之山嶺野人夤夜入帳殺斃洋人三十餘名洋人燒焚汗董戶董羅哄三野寨每寨野人約五六家七八家不等又接普洱鎮總兵屈洪泰等轉據委員刀丕文稟稱正月二十五日抵猛海宣尉司駐紮處所突遇洋官二員帶有洋兵六十名亦由孟連來到猛海會該宣慰司後又來會標下據稱奉鎮守緬甸大官飭來踏勘

緬屬地界到整控一看仍轉回緬都又有洋人五六十名由猛籠到九龍江咨請查照核辦前來卽希照會外部嗣後遇有差遣洋人須先行知會中國免滋事端爲要

初二日記

騰越廳鎮所稟英兵焚燒野寨情形係據隴川土司轉據鐵壁關撫夷排天貴所稟計被焚汗董戶董羅哄三野寨距排天貴麻湯五六十里洋兵旋進駐麻湯西北山上又移紮壘弄壘弄在鐵壁關外五十里麻湯內四十里又查隴川與緬甸分界係在洗帕河一作錫麻湯

在洗帕河以內。壘弄又在麻湯以內。實係騰越廳所屬土司地界。又普洱鎮迤南道稟孟連車里與孟艮連界。洋人所以到整控踏看地界者。蓋思茅之整控江以上。爲糯札喇卡等江。再上爲威遠雙江打環大箬等江。爲鎮邊之南北等江。爲緬甯之馬台等江。其源則麗江府之瀾滄江也。整控下游則爲九龍江。流徑暹羅南掌。過越南入海。水勢至整控下之九龍江較大。只有渡口。並無行船。此水路也。由孟艮至孟連八站。由孟連至九龍江十餘站。由孟艮直走九龍江亦十餘站。由九龍江上至整控江五六站。此旱路也。思茅倚邦易武各茶山。俱

在九龍江內。運茶出外。過思茅。整控江上之糯札江。爲多此茶路也。以上俱係內地。至孟連車里毘連孟良。自有兩土司所管。舊界爲憑。此中外交界所在也。車里現有宣慰司

### 初三日記

傳云。或多難以固其國。吾於今之日本見之。日本自魁柄下移。而平氏源氏北條氏足利氏織田氏豐臣氏德川氏迭起稱霸。國主虛擁神器。逾七百年。咸豐同治之間。德川氏之勢日衰。而諸侯並起力爭。英法俄美兵船環伺互逼。於是內訌外憂。糾結莫解。有二三豪傑者流。

起而倡議謂不合於一不足以禦外不和於敵不足以靖內因盡廢諸侯而退德川氏以全國之權歸之國主陸續與諸國通商步趨西法名曰維新之政三十年來外交之道日益講求披卻導歛措注得宜工藝益興商務益旺有蒸蒸日上之勢蓋日本之地小於中國不啻十倍而風氣之開先於中國則不止十年斯所以能轉貧弱而漸基富強也藉非多難以磨礪之激勵之安能若是是故國不在大小而在人才之奮興才不限方隅而惟識時務者斯謂之俊傑吾於今之日本見之

初四日記

德國皇帝於數日前到倫敦各國駐英公使均於午刻往謁會集柏金韓模宮德皇每見一使殷勤數語見余問近日想接中國來信

皇太后

大皇帝好否余答云好德皇又言中國近派許星使駐德已第二次來吾國矣余甚欣喜又言如有信到中國代我爲

皇太后

大皇帝請安遂點頭而退午後五點鐘余又赴英太子宮茶會英君主及德皇德后皆在焉



初六日記

泰西諸國都城皆有大書庫。如法義等國以印板精緻。裝潢華美。勝德俄丹瑞挪等國。以品類繁多。目錄謹嚴。排列整齊。勝大約各有短長。惟英京之大書庫尤爲盡善盡美。庫中善本爲數極多。且非止存有本國三百年前印出之書甚富。卽存地球各國之書亦甚多。卽所存中國書籍非泰西他國所能企及也。

初八日記

泰晤士報論法國似蓄狡謀。頗有兼併暹羅全土之意。力斥暹羅優待法人之非。并勸暹廷豫防法國新派華

印總督設謀暗害暹羅之事

初九日記

泰晤士報錄莽達拉

一譯作滿得雷

新報云密光

譯音

河東岸之

小山

譯音

邦干昌

譯音

擬將併入英國所屬境內干昌本介

於密光河東西兩岸將來情形究竟何如尙難定斷從前緬王每爭此地爲其縣邑現爲暹羅不法黨羽佔據

云

初十日記

總理衙門吉字第八號函開新金山禁阻華民本處以此事於華商華工生計大有關礙曾於十四年七月間

與華使再三辯論酌擬章程六條函送華使轉達政府  
迄今已逾數年尙無消息則此項章程能否照辦殊難  
懸揣朝鮮遣使泰西上年曾有改全權爲三等使之說  
北洋大臣復信有先謁華使如謂無庸挈往卽准予通  
融之語嗣後亦未能遽定

### 十一日記

法外部總辦倪薩爾稱上海領事來電南方各省會匪  
蜂起其擾害西人者皆會匪之黨恐於中國大局有礙  
是以各國協力自守調兵船二十餘入江巡防現催李  
梅回華卽日啟行俄使與駐法參贊慶靄堂晤談修約

之事大致尙無扞格。且有相抵之處。不日就道矣。基隆龍潭渚出產金沙。當軸設局抽釐。招民淘洗。近經礦師察閱金苗甚旺。穿山踰嶺。其勢蜿蜒。自基隆迄臺北。縣互六七十里。幾於無地蔑有。現擬節節推廣。委員開辦。又飭紳董雇募淘夫六十名。在錫口下游擇地試辦。俟有端倪。再行招徠民人。由近及遠。逐漸擴充。

### 十二日記

法議院之斐理黨。以德國苛待法商。攻訐外部。議紳亦隨聲附和。外部尙書李寶請退。各部留之。十二日同至議院轉圜。總理衙門來函。屬余與法外部商議減免。

西貢華人身稅因查許前大臣前與外部辯論數次未  
有成議係專指中圻北圻而言並未提及南圻此次應  
包括三圻意方周匝余卽函囑慶霽堂辦漢洋文照會  
彙

### 十三日記

總理衙門電開教案除七起外又五月杪如舉毀堂三  
十餘間未傷人南昌但拆華教士房一進現各省嚴防  
尙安靜希告法外部惟武穴已誅正兇二人而英領事  
意在株連並欲罪及印官多方作難並未提及卹償尙  
難了結庚

十四日記

法國麥丹報云俄太子抵海參歲時適火車道之鐵軌  
第一條造成於西五月十二日奉俄皇之命督率安置  
此路將來應抵烏蘇里之克拉弗斯該爲發軔之始基  
由此展至斯拉多恩德經亞歐兩洲二車站接入烏拉  
嶺一段之車道與俄境之車道相合又烏蘇里迤邐向  
北沿水流以達克拉排祿街入黑龍江境轉西經黑龍  
江省城白拉谷維申斯克并順江流以達克拉排祿街  
由吉林界外環繞而過將近蒙古進德郎斯培格里復  
入西伯里西境乃經擠搭依爾哥斯克東斯克卑忒祿

把佛祿斯克及哥爾岡以合於烏拉嶺車道之接筭處  
路長八千啟羅邁當程期十四日若今日自海參崴赴  
森比德堡則須二月也

### 十五日記

泰晤士報云印度民數十年以來由二百五十五兆增  
至二百八十五兆德國民數五年以來增多二兆二十  
六萬五千名法國民數增多一百萬名俄國民數增多  
十兆又本年英國查倫敦及威爾司居民計五百四十  
六萬九百七十六名十年前不過四百八十一萬三千  
五百名九十年前僅得一百五十七萬五千九百名

十七日記

暹羅由曼谷造一鐵路直抵八克那無

一譯作  
潘干

暹京十

一日來電云是日暹王親自興工觀者甚衆

英相沙

侯在議院宣議云謠傳法人已佔據暹羅之朗布拉班  
譯音省卻不甚確余深望暹羅自主之權毋爲他人侵奪  
然欲聯歐洲各國以保比利時之例保暹羅尙恐不能  
也

十八日記

德奧意三國連和之密約蓋隱防俄法兩國也舊約初  
訂五年近又展訂六年法人聞之不悅英國初不在約



中而外部與意國亦隱有成議。沙侯曾密許意人如一。且俄法有事。意之水陸全軍可盡力戰守。英之水師當代爲守護各海口。不必意人分神。其初機事甚密。厥後意王在一兵艦爲其武員述之。語漸聞於外。法廷聞之。滋不悅。有英人自法歸者。稱見法人恨英之意更甚於恨德國。蓋因其有助意之密約云。俄太子在日本遇刺客受驚傷痕旋愈。日本將遣有棲川親王赴俄廷謝罪。俄皇發電止之。乃輟其行。

### 十九日記

英自嘉慶二十一年以來。國勢蒸蒸日上。卽如國債一

事經格蘭斯登諾此谷德蔡爾奪哥申請人辦理抽捐還債一法自咸豐六年至光緒十一年已還國債一萬萬佛郎英倫三島當道光十七年居民止二十六兆今則增至三十八兆咸豐六年之稅僅三百零八兆鎊及光緒十一年至六百三十一兆鎊道光十六年出煤二十兆噸出鐵一兆二十萬噸光緒十一年出煤一百五十兆噸出鐵七兆噸咸豐六年進出口貨價二百六十兆鎊光緒十一年七百四十二兆鎊道光十八年商船運出之貨二兆三十萬噸光緒十一年七兆四十萬噸道光二十年信局分送之信八十二兆四十七萬一千

封迨後按照博郎條議整頓郵政復於同治十三年成  
培侯恩城瑞士條約郵遞得以徧通天下光緒十一年  
得信一萬萬四百零三兆封以上係進款加增之一證  
至於居民在公家行之存款得英金一百零八兆鎊富  
戶之款置各項公司者尙不在內入塾之孩至四兆四  
十六萬五千餘名且學塾之規制益精年數亦較昔加  
四倍印度則自咸豐九年一千八百五十八年起設一總督以治  
二百四十兆之居民澳大利亞洲田皆開墾有議院有  
每年用款城之繁庶不減歐洲格那大一譯作坎納達自同治  
八年一千八百六十七年改爲行省後居民八兆有奇阿非利加

一洲英所得之屬地足與法國頡頏。以上種種宏業人皆歸美於英主維多利亞之英明果決任賢使能五十年來執政雖分兩黨而和衷共濟朝無倖位是以能致一朝郅治之隆也。

### 二十日記

申刻赴沙侯所招哈得飛爾花園茶會。乘馬車至金司克羅司車棧坐汽車約行一點鐘到園。園乃三百年前英女主以利撒畢所居舊宮也。厥後以賜其宰相寶沙侯之遠祖。故沙侯先世居此已三百年。園地極爲闊敞。其室皆如宮殿之制。猶多三百年前舊式。余復觀其男

女圖像服飾亦異於今日。大抵昔時之宮室衣服其形式轉多與中國相似者。非若今日之迥然不同也。沙侯因意大利王子兼拿波利王。一譯作南柏爾斯王。邇來意國太子皆兼此王號云。到此特設茶會以款之。是日天氣晴朗。官紳及各國公使參贊會者頗眾。泰晤士報錄俄電云。俄已整備查探路徑之人。共五百名。前往中亞細亞之潘密爾平原地方遊歷以壯聲威。

## 二十一日記

近聞部庫奇窘。現議開源節流四事。一裁勇營。一四品以上廉銀減半給發。一加抽鹽斤。一准捐舉人。今年

英國官冊首相兼外部尙書係侯爵沙力斯伯里大律師霍爾司伯里軍機處尙書子爵克蘭白魯谷管印尙書伯爵卡多庚戶部尙書哥申內部尙書麥丟司藩部尙書納子福兵部尙書斯丹縐布印度部尙書子爵克羅司海部尙書哈密爾登商部尙書喜克司比處農部尙書車潑林郵部尙書雷克司又檢今年各國駐英公使總冊法使華亭登俄使狄斯德爾土耳其使洛斯丹巴沙德使伯爵哈子飛爾德奧使伯爵代姆意使伯爵湯義利西班牙使侯爵狄卡色皆頭等也二等公使除中國外荷蘭使伯爵狄拜倫德比利時使男爵瑣爾文

斯美使林庚·葡使狄·璵佛辣爾·日本使子爵高瓦西·波

斯使總兵阿辣愛士·巴西使蘇色柯里·丹使狄比爾·瑞

典使阿格門·阿真丹一譯作阿根庭使多明干士·智利

使敦卡羅士·哥倫比亞使安格羅·考斯德立加一譯作

爾黎·使巴辣德·希臘使陳納地士·海諦一作海地使辣多久

秘魯使敦卡羅·皆二等也·暹羅署使侯爵狄忙得里·葛

丁馬臘志略作危地馬拉使敦克利生·多檀香使火甫能·墨西

哥署使馬丁·乃士·尼葛辣格志略作尼葛拉瓜使巴利士·羅馬

尼亞署使南兒·楊橋·色飛亞即塞爾斐亞使姚維紀·記尤辣

千使阿爾白·多大抵皆三等四等也·瑞士向僅有總領

事近聞新派公使尙未知其姓名又衣久多國亦僅有  
總領事

二十五日記

統地球各國約計之共得男女一千五百十兆二十八  
萬人亞洲約八百三十兆五十九萬九千人歐洲約三  
百四十九兆八十七萬三千人阿洲約二百三十兆三  
十二萬一千人美洲約一百二十一兆三十二萬五千  
人澳大利亞洲及旁近各巨島約四百五十萬人歐地  
凡三百七十一萬三千三百四十英方里每方里居九  
十四人亞地凡一千七百十五萬零二百十英方里每



方里居四十人。阿地一千一百五十一萬四千七百七十英方里。每方里居十八人。美地一千五百三十一萬一千四百九十英方里。每方里居十人。澳大利亞三百五十萬英方里。每方里居二人。波刺蘭各島一百七十二萬八千五百英方里。每二十方里居一人。

二十六日記

福州創興織布局係巨紳陳伯潛閣學爲之倡。在其本鄉設局紡織。名曰果善堂。置機千餘架。招男婦學習。願領機架者聽之。惟棉紗非自種自紡。須由上海販運。洋紗購布者嫌其著身不暖。故難暢銷。然各紳見其辦有

日修上言卷之十一  
成效前年稟請卞制軍設立總局逐漸推廣遠近仿效  
今省城織布局已有二十九處矣南台之藤山畔已設  
有分局長樂縣亦另分一局 法國由河內築至諒山  
之鐵路其首一站現已落成 客冬德國清查戶口計  
通國男女共四十九兆四十二萬二千九百餘名追溯  
五年前戶口共男女四十六兆八十五萬五千七百餘  
名

二十七日記

緬甸稽核戶口英屬下緬甸約有三百七十三萬人較  
諸十年前增多七十萬人土緬甸約共二百五十萬人

美國紐約一埠。十一年前男女共一百二十萬零六千二百餘人。去年稽核戶口。其有一百五十一萬三千五百餘人。白蠟卽卑力國也。去年所收稅課。其洋銀二百五十萬員。支費共二百四十四萬七千九百餘員。重慶自通商後。凡挂洋旂之船。駛入川中者。須完落地釐金。而商人尙不甚願挂旂入川者。寥寥。近始有兩船前往。尙未知到埠後如何辦法。若照舊章。完正半稅。而不完落地釐金。則挂旂之船。自必異常踴躍。

### 二十八日記

有議東三省鐵路起訖地段者。其言曰。他省之鐵路。爲

自強計兼爲富民計東三省則但可計自強而已今議東路起自營口輪船運貨由此舍船就車且去瀋陽僅四百里較諸山海關至瀋陽近九百里創造之費較省惟營口凍河自立冬至春分輪船不通者五閱月天津凍河由大雪至驚蟄僅三閱月且北洋水陸防軍之精銳皆在津沽則東三省之鐵路不如由津沽起手查天津鐵路已造至灤州之林西若東展三百餘里可至山海關出關三百六十里至錦州府再二百六十里至牛莊再二百七十里至瀋陽如此則東三省與津沽一氣貫注由津沽至牛莊皆爲沿海要區有事時應援更爲

便速。況日下官商員董人役及火車客車貨車可暫與  
津沽公司通融取用。隨後從容購造。且牛莊距營口甚  
近。牛莊建有鐵路。其赴營赴津之兩路貨物生意必旺。  
通年常有車腳進款。無須另籌養路之費。此起處之宜  
審者也。又由瀋陽經長春府而達吉林。由吉林或經敦  
化縣或經甯古塔至涼水泉。過大盤嶺而達琿春。如此  
設防似爲周密。然先後緩急之間。有宜詳慎者。吉林迤  
東恆數十里不見人煙。而俄人常欲赴甯古塔購運米  
糧牲畜。若路接琿春。我無利而俄有益。且無事時遊歷  
覬覦。爭搭客車。較量運腳。爭端難免。且琿春僅一土圩。

防軍甚形單弱而距俄卡僅三十五里雖築鐵路無可恃以保護萬一失和彼族佔奪爲害更大至商民稀少養路無資猶患之小焉者也由吉至琿中間之老鴉嶺張廣才嶺海慶嶺大盤嶺皆壁立千仞天然屏蔽且徧地哈塘人過卽陷若因鐵路而鑿平填實亦屬非計因思鐵路經長春府至吉林陸路距伯都訥僅三百餘里水路達三姓呼蘭皆順流東下足攬奉吉黑三省之全局總之築路至吉林後似宜擇地勢之相宜工費之較省者再行相機籌畫日前暫至吉林爲止此訖處之宜審者也

二十九日記

申刻赴外部晤副尙書克舊與理論蕪湖武穴教案緝兇卹償等事。泰晤士報錄俄電云俄兵部議由中亞細亞之達司哈車站造鐵路接至阿富汗邊界之撒拉司此路於運兵通商頗關緊要。

三十日記

俄報云歐洲商務以倫敦爲最盛中國以上海爲最盛英滬往來若經蘇彝士河須歷程四十四日若取道紐約大西洋則歷程三十四日而川費較鉅若西伯利亞鐵路告成之後由倫敦至浮司罷勒華僅須三日再十

四日至琿春又三日至上海合計之僅二十日耳查  
美國之鐵路計有四條英屬加拿達亦造一條皆自東  
海至於西海計長俱有萬里之遙遣民開墾徵兵調餉  
保國致富通商利民莫便於鐵路故俄人刻意經營不  
遺餘力也

出使日記續刻卷之一終